

欽定剿平粵匪方略

欽定剿平粵匪方略卷一百七十八 丁巳年

七月初二日 辛巳 德興阿奏言查浦口爲江浦所

轄地面緊對金陵下關東連六合最爲江北要  
津江浦縣城之西有老西江口上距蕪湖百餘  
里下距浦口四十餘里據溫紹原稟請撥艇船  
多隻移泊老西江口以杜南岸賊援江浦之路  
旋接安勇周希濂等稟稱下游師船正在會攻

末便輕動是老西江口移泊師船之說礙難議  
行近聞南岸居民有渡江接濟賊糧情事卽經  
出示封江派員查出通江口岸七處如東溝小  
口王家溝史家港煙墩港新新河小沙河六處  
飭令儀徵縣概行堵塞僅留貓兒頭一處以通  
土橋紅單師船往來江路爲之一清至儀徵與  
瓜州逼近瓜州逆匪勢窮恐由江邊潛竄向西

衝機現於土橋附近之卡河灣黃泥港等處添  
紮營盤酌撥兵勇扼堵奏入報

初六日乙酉李孟羣奏言臣軍自羅田入皖旋進

紮英霍交界地方閏五月十六日督勇前進二  
十二日進抵霍山城下外有一河阻隔又值連  
旬大雨各弁兵伐竹編籬下水釘樁六月初三

日雨止橋成官軍出隊至城下觀賊形勢賊伏林麓中邀截我兵參將張得勝直衝賊伏殺賊多名賊遁入城查看西南北三門外共有賊營六座臣軍六千餘名不敷圍剿卽於西南兩路列營進逼北路則以霍山縣知縣鄧元鎬會同臣所派千總張兆麟攻之初四日我軍分路進攻同知袁懷忠率勇攻西門外賊營親拔濠籬

督勇齊進砍殺賊匪五百餘人參將趙鴻舉督  
隊攻西北門賊營千總李其昌等奮勇直上立  
將西北之營攻破都司盧又熊督勇力攻南面  
一營繞從營後殺入其營立破斃賊又數百人  
鄧元鎬等亦將北門一營奮力攻破正欲合力  
攻城值雨收隊初五日復督諸軍出隊該逆堅  
守大營不出千總彭萬華等從營後直入守備

鄭昌林等從營前直入立時踏破賊營焚燒欲  
殺斃賊七百餘人其西門外一小營亦被我軍  
燒燬霍山賊匪經此懲創悍賊已屬無多旦夕  
可下惟兵勇缺糧已久連日未能宿飽不能不  
暫爲休息而霍山練丁因年荒費少利在急攻  
初七日練丁攻賊北門臣軍攻西南兩門賊見  
團練稍弱遂盡由北門衝出練丁卻退傷亡甚

多我軍馳往救應隨繞赴北路前後包抄將賊  
衝爲兩截賊奔入城臣檄調六霍練勇盡數助  
剿並密飭參將張得勝等會同鄧元鎬馳往縣  
城併力攻擊十七日夜聞我兵甫抵城邊賊卽  
紛紛出城由東北竄逸官軍入城卽將縣城收  
復追殺賊匪三百餘名查臣軍數月以來飢乏  
已甚僅據河南撫臣英桂解過銀三千兩不敷



分給困苦情形本虞譁潰適又傳言湖北大營  
以重餉赴羅田募勇數日內臣營湘勇辭去者  
二千餘人幸各處團練會集得以乘勢收復縣  
城非意想所敢期也現查六安賊匪經撫臣福  
濟派兵由東北進攻屢獲全勝六安城賊亦甚  
窮蹙亟應合力圍攻惟臣軍缺餉勢難卽進惟  
有仰懇

天恩飭下河南撫臣暫撥臣餉三四萬兩卽將經過豫省之皖餉截留扣還俾臣軍得以專力戰攻不致坐失機會

李孟羣又奏言查賊首石達開曾犯湖北江西最爲兇悍前據黃梅各營探得該逆由安慶上竄湖北而臣在英山亦聞該逆徵糧於太湖等處並有與洪逆不合欲踞江西湖北之意蓋自

前年北竄之賊曾經

天戈奮討悉數殲除賊不敢復謀北向惟擾東南數省  
欲待我師老財匱而乘其敝江西蹂躪幾徧曾  
國藩水路孤軍東防西剿備極艱辛湖北自去  
冬克復武漢兵餉稍可支持惟當慎謀嚴守分  
途督戰可免復竄之虞而臣竊謂皖事尤宜亟  
圖也安徽當南北之交賊以安慶屏蔽金陵以

諸郡縣供其糧食不急攻我而冀我之緩攻此  
亦根株之病非早清皖淮上游速復安慶省城  
掃除勾結之捻匪收拾疲敝之人心亦不能專  
力長江俾大局日有起色也臣軍現在英山距  
廬近而距楚遠卽當遵

旨會合福濟諸軍勦捕各屬匪黨若得餉需無缺更蒙  
飭撥馬隊數百名助之合勦當可日進而日強蓋馬隊

爲我

朝勁旅弧矢之威遐邇畏服今各省勦賊皆賴馬  
隊之力而用之皖境尤爲相宜奏入

上命軍機大臣傳諭李孟羣曰李孟羣自英山進勦後  
疊次獲勝現當糧匱勇飢猶能激勵軍心使士卒忘  
其飢疲團練樂於效命旬日之間卽將霍山縣城克  
復調度允合機宜六安州逆匪聞有窮蹙之勢仍當

乘勝進剿與廬州官軍會合庶可次第殲除疊經諭知福濟分撥餉銀總未能設法疏通道路以致勇多散去本日復諭英桂撥銀三四萬兩解赴李孟羣軍營俟各省解皖餉銀經過豫境再行截留扣抵諒必能就近協撥至所請添撥馬隊並諭英桂酌量情形如宿州賊勢稍鬆卽飭容照帶領馬隊五百名前赴該藩司軍營助剿李孟羣務當先就現有兵力急圖

攻剿六安迅拔州城期與福濟等會合進兵翦此醜  
類

上以命軍機大臣傳諭英桂曰李孟羣一軍由湖北赴  
援廬州疊次克復城池現擬進攻六安惟軍餉缺乏  
士卒飢疲湖南勇已散去二千餘人該藩司現在六  
安廬州餉道尙未能通著英桂籌銀三四萬兩就近  
解赴李孟羣軍營俟有由豫解赴廬州之餉准其截

留扣還此路兵勇攻剿頗能得力於皖豫兩省大局  
攸關英桂接奉此旨務卽迅速籌撥毋許延誤現在  
各路馬隊惟容照所帶五百名近在宿州著英桂酌  
量情形如宿州現在防剿稍鬆卽飭容照帶領馳往  
六安協同李孟羣攻剿

上諭內閣曰李孟羣一軍自入安徽攻克英山縣城當  
經諭令乘勝進攻霍六該藩司督率兵勇進抵霍山



城下殺賊多名各路官軍攻破城外賊營賊匪逃竄  
收復縣城所辦尙屬得手仍著該藩司督軍進克六  
安漸清皖境

初十日巳丑晏端書奏言池州大通之賊竄至青

陽廟前鎮而蕪湖銅陵之賊又竄踞繁昌鄧紹  
良派守備饒魁士等進紮南陵並飭遊擊吳再  
升等進攻繁昌該逆抵死抗拒未能攻拔而青

陽一帶驟添賊黨四五千人聲言分路進犯徽甯周天受駐紮崇覺寺專扼徽州要隘其甯國之涇太二縣尙覺空虛亟須厚集兵力幸江南溧水句容先後克復建平防務已鬆臣與鄧紹良咨調總兵秦如虎隨帶兵勇移紮於涇太適中之楊家莊督飭副將蔣錫光等相機防剿其鄧紹良派援青陽之捷勇五百名亦卽調回涇

縣與吳正熙會扼萬級嶺嗣蕪湖賊黨日益江北又有股匪二三千人竄至奎潭思與繁昌逆股聯成犄角之勢鄧紹良飛飭遊擊田應科等會同南陵防兵於五月二十七日進兵奎潭擒斬長髮老賊十四名殲斃匪黨一百餘名餘匪從黃公渡一帶退竄二十八日進兵石碓渡追至八里灣水次擊斃溺水者無算餘黨逃回蕪

湖惟黃池河面賊艘蟻聚與蕪湖一水相通道  
員仲孫懋等於舊設巡船之外添設勇船十隻  
晝夜輪流會哨鄧紹良復分紮施家渡奎潭兩  
處聯絡水陸聲勢六月初七日蕪湖之賊分股  
二三千人進犯孤山壩總兵蕭知音等分路擊  
退斃賊不少十三日句容湖墅及蕪湖逆黨二  
千餘人均圖進犯黃池仲孫懋等擊之於清水

河該逆敗遁鄧紹良現已規復繁昌並於沿江  
力籌布置一面飭令蕭知音前赴老鴉山相度  
地勢安紮營壘以爲攻取蕪湖之計惟青陽石  
埭南陵銅陵各縣與黃池灣沚等處賊黨絡繹  
而來並聞逆首石達開有由青陽入犯涇太之  
說又據廣德州宣城涇縣先後稟報拏獲奸細  
訊有圖襲徽甯窺伺蘇杭等語惟有責令各防

將士杜其內竄以冀仰副

聖主眷念東南之至意

晏端書又奏言查江南大營現已移攻鎮江不  
日可期告捷現探金柱關東梁山各路逆黨分  
赴金陵應援鎮江而蕪湖爲水路要衝我所必  
攻亦賊所必守鄧紹良已紮老鴉山意將以勦  
爲防惟蕪湖石卡堅厚旣難卽拔更未可越境

以往剿金陵如江南大營於鎮江得手後先分  
一旅之師由金柱關進攻蕪湖甯國防兵同時  
併力夾擊一俟蕪卡克復撥隊臨江扼守再移  
黃池灣沚之師進駐繁昌聯絡水師以清上游  
水陸之賊庶將來合軍環攻金陵可期事半功  
倍至江西浮梁景德久爲賊衆往來屯聚之所  
徽郡屢被蹂躪近日撫建回竄之賊復踞樂平

縣城雖經福興派遊擊賴高翔等統帶兵團將  
樂平克復而餘孽仍竄歸景德如由福興添撥  
一軍與臣派駐婺源兵勇分路前往剿除以重  
兵扼守景德則鄱浮撫建往來賊蹤可以隔絕  
不獨信饒徽衢防務漸緩卽攻取撫建亦易得  
手惟撫州之賊復竄進賢窺伺省城李定太已  
由省往剿福興卽須分兵前紮貴弋策應臣派



駐婺源之師仍當內防徽衢各路未便出勦萬  
一江右軍情緊急廣饒有警嚴衢獨當其衝浙  
省亦未得安堵也

晏端書又奏言據將軍福興咨擬俟李定太旋  
省後移營貴溪弋陽一帶居中調度堵勦兼施  
將來饒州各路勦辦得手該將軍卽須移兵進  
取撫州而廣信存兵太單自應先爲計及第浙

省現已籌撥兵勇駐守婺源大半由玉山常山  
各防所抽派前往至玉山接壤廣信後路未可  
空虛臣卽當酌添一軍移紮玉山以壯聲勢若  
欲分隊協守廣信則目前徽甯軍情均在喫緊  
尙難豫籌調撥再饒廷選督防三衢是其專責  
嗣因浙師派防婺源以固常開門戶所有防剿  
事宜經臣奏明統歸該總兵調度儻將來福興

移師進剿撫建而廣信有警必仍令該總兵隨時相機策應以期衢信兩防均臻鞏固萬一婺源廣信軍情同時並緊則該總兵祇能顧及婺源惟有仍請福興回顧信郡以全大局當經咨覆去後茲准福興來函謂該將軍移營之議未便從緩而廣信空虛之處另行設法籌防日後廣信如果有警該將軍必當亟圖回顧仍囑轉

聞

飭饒廷選就近兼顧以期兩全奏入均報

十一日

庚寅

兩江總督何桂清奏言臣自奉

命到江南以來仰體

皇上眷顧東南至意不分畛域文武和衷原冀迅掃賊氛立復疆土前因張國樑移師鎮江原可迅圖克復惟該逆師船衆多必得調集水軍方足制

其死命又慮德興阿等紮營蔣王廟離水營較遠耳目難周軍情急於星火恐張國樑呼應不靈若待臨時往返商調必滋貽誤臣故咨商德興阿請將下游泊承陞周士法所帶拖罾艇師各船暫由和春張國樑一體調度至是否可行仍由德興阿等覈定飭遵臣非敢有所撓越也況臣欲責成水師兼爲防賊北竄起見亦非但

顧江南不顧江北臣忝任兩江兼管操江事宜  
責無旁貸雖非專辦軍務而偶有所見不得不  
與南北統帥和衷熟商以冀聯爲一氣此臣區  
區報

國之愚忱不敢不上達於

君父之前耳奏入

上命軍機大臣傳諭何桂清曰何桂清自抵江南卽能

與和春張國樑遇事和衷參酌軍務前次咨調下游  
師船係爲速克鎮江起見朕已諭令德興阿等督飭  
水軍與南岸同時並舉矣南北兩岸均該督統轄地  
方無分畛域嗣後仍應遇事咨商速掃妖氛以副朕  
望

十五日甲午官文胡林翼奏言逆匪糾集大股於

廣濟內湖童司牌一帶踞險築壘伺我黃梅各

軍之隙六月二十四日都興阿飭孔廣順等各營移紮武穴龍坪等處以資守禦卽以十里鋪億生寺各營爲前敵又商令楊載福派都司胡友亮管帶三板船繞入內湖二十五日黃梅北山及大河鋪迤南一帶賊匪全數擁出直撲十里鋪各營翼長多隆阿揮隊迎擊獲勝副將鮑超復乘勝攻毀賊壘一座殺賊三百餘名二十



六日賊又各路擁出漫山遍野多隆阿大張疑  
兵於十里鋪之比自率勁騎同鮑超潛攻億生  
寺西路賊壘賊知我軍注意於北而不虞西路  
之猝至也羣賊駭奔我軍拔樁越濠焚燬賊壘  
三座同時十里鋪賊亦被我軍衝突奔逃兩路  
計斃賊千餘名是日內湖水師亦分發三板搜  
剿轟燒賊船百餘奪獲二十餘隻又駛至童司

牌小河轟擊賊壘而相距童司牌數十里之官  
橋亦有賊划紮成橋渡復經官兵截剿毀其船  
渡而還連日都興阿復密商李續賓親率隊伍  
由南岸渡至北岸羅昌驛與都興阿軍會合進  
剿該逆於河中搭浮橋三座賊壘繇互如常山  
之蛇壘前長港環繞當卽派定隊伍分攻各壘  
並豫備柴草填港造橋都興阿以馬隊分路接

應二十九日卯刻李續賓齊隊前進搭橋甫成  
該逆卽出衆抗拒我軍嚴陣以待俟賊偪近以  
劈山礮轟之賊勢稍挫我軍踰濠齊拋火器賊  
壘同時火起共斃賊約四百名水師復於橋東  
橫擊燒燬賊划百數十號該逆擁擠落水並被  
我兵追殺及投湖淹斃者計千數百名童司牌  
兩岸賊壘十三座悉數毀平

臣胡林翼率同唐

訓方進紮黃岡之傅家嶺分撥翼長巴揚阿馬  
步防守馬鞍山要隘舒保馬隊各路接應七月  
初一日偵知孫家背股匪會合上巴河匪黨乘  
我營壘初定分路偷撲我軍繞出賊後擊其不  
備賊衆潰竄參將何紹彩等復率各營齊力追  
擊沿途斃賊百餘名擒斬長髮老賊六十餘名  
奪獲旗械多件查斬廣逆燄正張經都興阿李

續賓將逆巢悉數毀除分軍駐守實屬調度合  
宜不特黃梅各軍氣勢益固卽武穴龍坪運糧  
要道亦臻安堵戰守皆有可恃現由瑞州調撥  
李賓宜一軍繞道行抵黃州臣胡林翼卽當面  
商機宜乘此聲威將蕪黃逆氛節節掃蕩以便  
專力攻取九江

官文胡林翼又奏言貴州安義鎮總兵王國才

由黃梅城外移營進紮濯港正督兵起程卽有  
賊來偷撲王國才督隊開礮斃賊多名賊拋擲  
火器適中我營火藥王國才被火轟傷登時陣  
亡查王國才在楚數年臨敵身先士卒大小數  
百戰所向有功乃因移營禦敵陣亡不勝悼惜  
相應籲懇

天恩俯准

賞加王國才提督銜

飭部照提督陣亡例從優議卹並於陣亡及原籍地方  
建立專祠以慰忠魂其同時被傷身故之委員  
吳炳吳灼張兆麟三員並請一併議卹奏入

上諭內閣曰此次剿除賊壘疊獲大勝辦理尙爲得手  
著官文等乘此聲威迅掃逆氛毋留餘孽王國才隨  
剿數年歷著戰功茲因移營禦敵奮勇捐軀實堪憫

惻著賞加提督銜從優照提督陣亡例議卹並於陣  
亡及原籍地方建立專祠以慰忠魂其同時被傷身  
故之委員湖南候補訓導吳炳從九品銜吳灼湖北  
候選府經歷縣丞張兆麟著一併議卹

二十日 己亥 德興阿翁同書奏言查鎮江近接金

陵自調派水師扼紮上游江面並無逆船來往  
其濟運糧食亦多在棲霞以下夾港內河非水



師兵力所能及惟此時圍攻鎮城自以嚴斷賊  
食賊援爲要卽經移咨和春張國樑將陳世忠  
所管焦山艇師兼聽南岸調遣又以內河多有  
通江小口復令陳國泰將守備賴鎮海所帶原  
防高資之拖罈船五隻亦飭就近兼聽南岸調  
遣俾得豫先布置其或賊船由江而下則浦口  
觀音門東溝土橋均有水師扼紮臣等亦已飛

聞

檄周希濂等節節堵防毋任駛竄如此南北兩  
軍聯絡一氣並不少分畛域似與會勦機宜有  
益奏入報

二十四日 癸卯 何桂清晏端書奏言昨准張芾來

函謂月餘以來軍情安謐署皖南鎮總兵江長  
貴駐紮漁亭以防西路福建漳州鎮總兵周天

受駐紮石埭以禦北路其南路婺源有徽浙官兵四千餘人相爲犄角布置尙屬周密所有徽州防剿事宜請以周天受接辦並可與提臣鄧紹良總兵秦如虎及皖南鎮道會商策應該員擬卽扶柩回籍並繕摺籲懇

天恩囑爲呈遞前來伏查江皖近日軍情擬俟鎮江得手卽分兵攻取蕪湖再擣金陵所有各路匪黨

勢必奔竄於皖南江右而徽州接壤池饒情形  
更爲萬緊月前石逆有竄犯徽州之信張芾在  
徽督師三載調度深合機宜卽周天受等亦必  
事事稟承方無貽誤是就該郡情形而論張芾  
誠不可一日離徽該員與臣等尺牘往還深知  
國事爲重萬不敢以私情固乞

恩施惟人子苦衷不能不據情上達所有該員原摺由

驛代遞恭候

訓示遵行

同日候補三品京堂張芾奏言臣由已革巡撫發往安徽軍營專辦徽池防勦善後事務三年以來池州未能恢復徽境屢有寇氛上年九月賊擾休甯臣在軍中聞臣母王氏在浙江紹興府寓所病故其時因攻勦喫緊飲泣從戎逮克

復休城始請何桂清據情代奏欽奉

諭旨俟該處防務接替有人卽賞假六箇月回籍營葬

現在江長貴駐紮漁亭周天受駐紮石埭南路  
婺源又有晏端書派兵扼守布置尙屬周密浙  
西門戶當不至有意外之虞臣理應乞假治喪  
稍伸人子之情臣母柩滯南方未能歸葬臣之  
同產今無一存臣奔喪已逾三月居喪未及兩

旬撫躬循省無地自容再三躊躇惟有仰懇

天恩許臣終制感且不朽抑或

賞假數月俾臣送母柩回籍營葬仍赴軍前效力臣亦不敢藉詞規避自外

生成均奏入

上諭內閣曰候補三品京堂張芾專辦徽池防剿三載以來頗資得力前丁母憂呈請回籍營葬當經諭令

俟接替有人卽行給假六箇月回籍葬親茲復據何桂清晏端書據情代奏並張芾自行具摺請回籍營葬後懇恩終制等語現在徽州防務仍當喫緊張芾熟悉情形仍著暫留防勦俟軍務稍平卽遵前旨給假六箇月回籍營葬



欽定剿平粵匪方略卷一百七十九 丁巳年

七月二十五日 甲辰 官文胡林翼奏言七月初一

日都興阿派翼長多隆阿督帶馬隊副將鮑超  
督率步隊分五路進攻黃蠟山等處賊巢又分  
兩翼以截王家河十里鋪兩路之賊石清吉帶  
兵勇接應姜玉順帶隊截賊後路賊見我軍遽  
至亦分股齊出抗拒鏖戰數時之久多隆阿偵

知該匪以老弱守壘而伏悍賊於村落以截我軍遂商令鮑超分兵繞攻其後多隆阿派馬隊直衝村落伏賊盡起勢甚兇悍多隆阿揮隊直進殪其悍賊數十名賊始敗竄鮑超卽率勇分攻賊壘施放噴筒賊營四面火起羣賊狂奔我軍連夜追勦直至初二日收隊計踏毀黃蠟山甘家畈等處賊壘四十八座共斬賊五千餘名

淹斃者不計其數生擒長髮老賊數百名水師  
楊載福前派都司宋美富帶領礮船扼守蘄州  
江面先於六月二十六日拆毀菩提壩逆匪浮  
橋七月初九日復督勇搜剿斬殺百餘生擒長  
髮七名奪獲洋礮旗幟刀矛無算臣胡林翼以  
孫家嘴流水灣踞賊爲黃岡蘄水之衝亟應設  
計剿除十一日令李續宜率湘寶信五營進攻

以舒保馬隊繼之又派遊擊孫昌凱都司左光  
培帶水師會勦並令唐訓方等埋伏鳳凰山等  
處以防援賊十二日李續宜等督隊前進抵灞  
崎山見賊搭有浮橋兩道與蘄水之賊往來相  
通李續宜分兵立於灞崎山巔以防蘄水之賊  
截我後路又派從九李耀南等分路進攻而自  
督千總蕭啟掌等率兵隨舒保馬隊由中路進

列陣甫定該逆率衆三四千人分路抗拒相持  
數時我軍一鼓而前馬隊縱橫衝擊斃其騎馬  
悍賊十餘名餘賊大亂乘勝追勦焚燬賊壘六  
座其蘄水援賊千餘經都司巢日昇等督兵迎  
勦當卽敗退統計各路陣斬擊斃之賊及投水  
死者約二千餘名李續宜復率湘寶等營馳往  
流水灣攻勦賊壘該逆知孫家嘴賊已大敗匿

而不出適三台河防兵鄒漢章等隊伍及孫昌  
凱礮船續至水陸夾攻斃賊無數越牆之賊四  
五百人經伏兵全數殲戮其往援孫家嘴之賊  
約三千餘人經唐訓方率余雲龍等奮力擊斃  
斃賊甚多追殺十餘里而還孫家嘴等處業已  
肅清查黃梅馬步各軍前次童司牌之戰及現  
在黃蠟山等處大獲全勝前後斬馘以萬計雖

係都興阿李續宜調度得宜亦由該將領奮勇  
圖功其鮑超一員連日血戰率同親兵累屍登  
壘身骸受傷仍不少卻尤爲忠勇罕匹相應仰  
懇

天恩優加獎勵俾知感奮此外出力員弁兵勇懇請查  
明保獎奏入

上諭內閣曰此次黃梅官軍以少擊衆連獲大捷在事

將弁兵勇均屬奮勇副將銜陝西參將鮑超連日血戰尤爲出力著以副將儘先選補並賞加總兵銜以示鼓勵其餘出力員弁兵勇仍著官文等酌量保奏候朕施恩

同日耆齡奏言賊匪屯聚甯都州屬釣峯地方約四五萬人閏五月二十六日王鑫率勇追至釣峯由中路進力斬悍賊數十人賊乃敗走左



路山上一股經王開化設伏敗之焚其巢穴追  
斬二三百人沿河之賊望風奔潰其右路山上  
賊巢亦經王文瑞攻破逆匪奔竄王鑫令各營  
搭橋過河追剿陣斬僞將軍毛幅富餘匪敗逃  
約共斃賊二千六七百人時永豐敗匪思竄吉  
安王鑫率兵回剿二十九日行抵小源地方探  
聞賊衆數千屯紮古夏地方將撲甯都王鑫卽

於六月初一日進勦令張運蘭等率勇分伏兩  
邊山後約聞鼓聲而出自率小隊至河邊誘戰  
悍賊五六千過河來撲王鑫退至山坡俟賊偏  
近鳴鼓回兵兩旁伏兵齊起該逆卽退張運蘭  
已衝過對岸前後夾擊斃賊甚衆追至謝坊村  
內另股千餘出拒又被我軍擊斃二百餘人共  
計斃賊一千三四百人初三日又敗賊於東山

壩殲斃三千餘人旋探僞老國宗楊宜青等屬  
聚廣昌詐稱十二萬人欲由甯都永豐趨救吉  
安分擾贛州湖南王鑫以此股逆匪不除有礙  
江楚大局遂激勵士卒整頓鄉團剋期進剿並  
飭朱惟堂等率兵先往樂安勦辦以杜永豐敗  
匪竄擾十六日王鑫率湘勇由大路進都司張  
騰霄知縣孫效曾各率團勇從左路進十七日

黎明抵距廣昌城五里之三官殿悍賊萬餘分  
五路而來我軍亦分五路應之王鑫親身率勇  
奮力直衝五路之勇乘勢齊進賊大敗奔竄我  
軍奮追至長生橋地方忽僞七國宗楊輔青帶  
賊數萬前來接應敗賊亦復回鬪王鑫揮勇奮  
擊張騰霄匹馬陷陣賊又大敗追至南豐縣界  
而還斃賊約三千餘人生擒一百十三名拔出

難民二千餘人該逆屢敗之後心膽皆寒南豐  
宜黃之賊均已遁去千總朱惟堂等亦於十九  
日收復樂安縣城正擬進攻撫建據報吉安各  
營失利隨連夜馳回永豐因新淦賊匪日多與  
吉安之賊聯爲一氣擬先攻新淦次及吉水吉  
安等情前來查該道王鑫追勦甯都州敗匪復  
值大股賊匪圖犯吉安頻摧大敵殲賊不下萬

人拔出難民一萬數千人戰功之偉實所罕覩  
現因吉郡各營失利不得不折回策應惟新淦  
之賊日聚日衆旣已上通吉安復思旁援臨瑞  
必須先行勦除方免受其牽掣奏入

上諭內閣曰記名道王鑫追勦江西甯都州敗匪適值  
僞國宗楊逆率黨二三萬人由新城往援吉安並僞  
國宗楊宜青等與石逆撥來賊黨詐稱十二萬人欲

由甯都永豐趨救吉安分擾贛州湖南均經該道激  
勵士卒整頓鄉團先後擊敗殲賊不下萬人拔出難  
民一萬數千人其所派往甯都勦賊之朱惟堂等亦  
於六月十九日收復樂安縣城此次王鑫勦辦各股  
匪徒斬馘盈萬大挫兇鋒著卽乘此聲威由新淦進  
攻吉安以期迅克堅城

耆齡又奏言據吳坤修等稟報閏五月十一日

瑞州賊匪始以數百人出犯北岸旋由金川門  
出三股撲南岸湘寶各營分投迎擊該逆卽遁  
入城二十五二十六二十七等日該逆屢次出  
撲均被我軍擊退六月初更時分風雨  
交作賊復傾巢而出分作數股丁俊等兩面橫  
截寶前營從旁夾擊該逆一股仍退回城一股  
三四千人繞過斷水橋望西北狂奔普承堯恐



逆衆遠竄擾及他處立泥都司章奪錦等不分  
晝夜先後跟追劉騰鴻派劉騰鶴等率勇邀截  
吳坤修亦派兵往駐分宜以扼袁郡該逆始竄  
奉新新昌邊界知防守嚴密不敢入境折向西  
南分爲兩股頭起七八百人於二十三日竄至  
峽江縣屬之仁和墟經劉長佑派令鄭金華等  
併力迎戰康國器等率領戰船沿河夾擊斬賊

數百名生擒二名該逆競拆民房門板渡河水  
師開礮轟擊溺斃甚衆殘匪二百餘人自墟後  
衝出翟國彥等督勇追至烏口殲戮無算二起  
約三千人二十一日竄至上高縣泗溪地方因  
大雨水漲未能渡越章奪錦追至殺賊多名該  
逆沿河敗逃二十二日竄至上高經蕭啟江等  
率勇堵禦上高縣知縣孫文鑄會營督率兵勇

往助旋經黃秉珍等追至將馬隊分爲兩路奮  
勇抄擊該逆大股四散奔竄上高縣城本多坍  
塌該逆卽竄入城黃秉珍等分門追入竭力巷  
戰殺賊四百餘人馬隊把總賀榮陞立斬僞監  
軍梁逆復擒首逆僞總制嚴守和一名敗匪由  
南門逃竄逆首僞檢點賴蘋新被火彈燒傷情  
急棄馬投水餘匪奪船而渡約近千人共計溺

斃殲斃之賊將及二千人渡河之賊不經段起  
樊俊率勇追殺數十人逃散之賊僅三四百人  
望吉安而去瑞郡各營以城賊既經分竄急應  
乘時攻拔遂於二十及二十八九等日各率存  
營弁勇晝夜攻擊劉騰鴻將大礮移近賊匪礮  
臺將石橋頭層礮臺轟塌燒斃賊二百餘人並  
將礮臺挖倒普承堯率勇平濠毀椿直逼城下

賊矢石如雨仍不稍退吳坤修亦移大礮對城  
轟擊竟夜並率勇拔籤踰濠屢次薄城駕梯欲  
上均被礮石擊回遊擊劉國斌率水師戰船協  
攻東門礮賊不少奪獲賊船四號查瑞州之賊  
被圍經年困極思竄幸普承堯派隊追勦各營  
跟蹤前進節節截殺礮擒殆盡並斬首逆嚴守  
和等多名使羣兇不致倖逃法網洵足以伸

國法而快人心在事尤爲出力之縣丞黃秉珍等  
擬先請給予獎敘其防範不密之都司劉光明  
千總李華榮請一併革職留營差遣查長濠係  
廣東南韶連道吳坤修分管咎亦難辭請拔去  
花翎巡檢沈慶安把總黃雲力戰陣亡請

飭部從優議卹奏入

上諭內閣曰此股竄匪經官軍節節截勦不致倖逃法

網所有尤爲出力之縣丞黃秉珍著以知縣遇缺卽  
補並賞加同知銜都司章奪錦著以遊擊儘先選用  
並賞換花翎國子監典簿陳徽言著以通判不論雙  
單月遇缺卽選儘先把總賀榮陞著以守備遇缺卽  
補陳徽言賀榮陞並著賞戴藍翎縣丞劉嶽昭著以  
知縣儘先選用從九品劉德謙著以府經歷縣丞遇  
缺卽選其防範不密致城賊他竄之都司劉光明千

總李華榮均著革職仍留營差遣以觀後效廣東南  
韶連道吳坤修著拔去花翎仍著耆齡督飭在營將  
弁實力進攻速將瑞州城池收復陣亡之巡檢沈慶  
安把總黃雲均著從優議卹

耆齡又奏言閏五月二十一至六月初六等日  
吉安府城賊匪或出千餘人或數百人修壘撲  
營均經官軍擊退初十日周鳳山進紮螺岡東



北兩門出賊四千餘，猝死來爭。周鳳山派隊迎擊，趙煥聯、劉培元各督所部鏖戰，斃賊數百人。賊退，十一日城賊七千餘，蠡擁來撲。周鳳山一面督勇開濠，一面分隊接戰，殲賊四百餘人。十二至十六等日，連日接戰，均有斬擒。十七日大股賊匪突出西門，文翼督率水陸各勇迎擊。趙煥聯、劉培元、周鳳山各派勇夾攻，賊敗回巢。是

日午刻出賊萬餘包出鳳字營後周鳳山派撥  
各營分五路迎敵槍礮齊施奮力衝突斃賊百  
餘人該逆抵死不退各勇戰久力疲寡不敵衆  
又以口糧積欠軍心不固紛紛敗潰賊匪撲入  
營盤放火焚燬該逆乘勢往撲和長兩營趙煥  
聯劉培元撤隊回救馳至營前營內業已火起  
亦卽相繼被陷賊又撲吉字營文翼督同弁勇

竭力固守相持至晚賊始退去趙煥聯劉培元  
營壘旣失退紮固江文翼因孤軍無援恐爲賊  
乘亦卽拔營繼退該處糧米全無士卒終夜未  
能得食各營會議退紮安福現在和長兩營暫  
駐安福城內吉字營紮城外以資堵剿查吉安  
八縣一廳均已克復所未下者僅一府城今鳳  
字等營被匪撲陷賊勢轉張探聞該逆已擾及

吉水之阜田地方難保不四處延蔓臣飛飭贛南鎮道選派兵勇三千名星馳赴吉會合吉和長三營再籌進攻並令黃冕等速調龍泉楚贛兩軍移紮泰和遏賊上竄之路此次鳳字營雖首先失利究因連日苦戰兵力疲乏加以欠餉過久人無固心致有此失知府趙煥聯參將劉培元營壘被踏皆因往救鳳字營所致與守禦

不力者不同且前此克復永甯吉水等縣並圍  
攻郡城曾經百戰屢著勞績功堪抵過可否與  
前任廣東羅定協副將周鳳山均免置議出自  
逾格鴻慈吉安府知府黃冕籌辦吉安各營軍餉是其  
專責乃欠餉日久戰士飢疲以致吉郡之師功  
敗垂成實難辭咎應請

旨將吉安府知府黃冕摘去頂戴革職留任仍責令趕

籌餉需軍械以贖前愆都司張開輯被燒殞命  
陳光孚中礮陣亡請照遊擊陣亡例從優議卹  
外委周九皋李芳園請交部議卹奏入

上諭內閣曰此次各營官兵失利實因連日苦戰師疲  
軍餉不繼所有帶兵之知府趙煥聯參將劉培元副  
將周鳳山均著免其置議吉安府知府黃冕籌辦軍  
餉是其專責乃因欠發日久以致戰士飢疲實難辭

咎著摘去頂戴革職留任責令趕籌餉需軍械儘再  
不知愧奮卽行嚴叅治罪都司張開韓被燒殞命陳  
光孚中礮陣亡深堪憫憫均著照遊擊陣亡例從優  
議卹外委周九皋李芳園均著交部議卹

耆齡又奏言據胡林翼咨蘄州曹家河官軍失利  
恐賊上犯囑臣派兵來援臣當以王鑫劉騰  
鴻各紮要地功在垂成萬難他調但湖北官軍

新挫雖經胡林翼收集整理而沿江地面甚寬  
難保逆匪不偷渡南岸繞道上竄隨飭劉騰鴻  
普承堯抽撥湘勇副中等營共一千六百餘名  
交李續宜統帶於六月十二日拔營起程取道  
奉新靖安武甯赴湖北興國州扼要守禦杜賊  
偷渡

耆齡又奏言接福興咨以江南敗匪盡趨池州



江西饒郡堵剿緊要東路之兵不足囑臣速籌  
辦理臣查饒州府界連徽池二郡實爲江西東  
北一大門戶皖寇來饒其道有二由彭湖口來  
者以都昌縣之張家嶺爲扼要由池州來者以  
建德縣之昭潭街爲扼要必得重兵兩枝分守  
兩處仍須徽州官兵嚴防祁門縣則省東藩籬  
可期鞏固惟是江西情形與兩湖浙江不同該

三省腹地平靜祇須謹守邊疆江西賊匪蔓延  
若肘腋之患未能翦除勢難兼顧邊境明知饒  
州兵力不敷苦於無可分撥臣惟有激勵水陸  
各營奮勉攻勦務期自西而東防勦兼籌內寇  
外賊以次殄滅仍責成署饒州府知府馮詢先  
就現駐該郡兵勇布置守禦

耆齡又奏言撫州大股賊匪自崇仁竄至豐城

之石灘街千總蔡癸發帶兵堵剿未能得手自  
應派兵剿滅以免蔓延惟進賢一路亦有大股  
賊匪撲營之謠省城兵力甚單不遑兼顧適副  
將周鳳山帶勇一千餘名到省當飭馳往豐城  
並添調駐紮李家渡兵二百餘名彰武軍潮勇  
三百餘名前往合剿一面飭令進賢各起兵勇  
確探嚴防聯絡鄉團竭力堵剿並令李定太一

軍居中策應何處尤爲緊急卽往何處督剿俟  
豐城股匪撲滅後相度機宜籌攻東鄉崇仁等  
縣先拔外邑次攻郡垣漸清東路以絕賊援

耆齡又奏言道員劉長佑劉于溍知府蕭啟江  
等督率江楚水陸兵勇往攻臨郡自閏五月初  
八至十九等日賊匪屢次出犯均被我軍擊回  
六月初十日城賊三千餘人突出南門沿河疾

進西門福壽門亦各出賊誘戰劉長佑督兵迎敵斃賊數十賊衆退走北門又爲蕭啟江田興恕所敗賊趨東門又爲劉于瀉水軍所敗十一十四兩日出撲之賊亦經蕭啟江田興恕楚軍並新武軍勦退各有斬獲至新淦縣城聚賊日衆冀渡贛河救援臨郡經劉長佑劉于瀉派水陸各軍隔河防守並經辦理團練之編修吳嘉

賓派千總伍連魁率兵進攻淦邑劉長佑劉于  
涇亦飭防守贛河水陸各軍連日會剿殺賊四  
百餘名燒燬賊船四隻渡船四十隻查臨郡經  
江楚各軍圍逼可期聚殲惟撫州賊黨麕聚新  
淦時思倫渡赴援經臣飭陸勇於贛河西岸節  
節嚴防水師戰船上下巡哨毋任潛越近因吉  
郡官軍失利賊匪擾及吉水阜田恐自峽江闌

入新喻圖襲臨江大營或乘虛往撲袁郡業經  
蕭啟江帶勇千餘名往守喻邑因兵力尙單又  
飭瑞州各營籌撥勁勇三千名馳往協防以固  
袁臨門戶奏入均報

同日福興奏言查石逆與洪逆內訌後踞守安  
慶誘致金陵舊黨另樹一幟該逆在賊首中最

稱狡桀江省之臨瑞撫建諸郡縣皆係該逆親率夥黨相繼攻陷今既近踞安慶則江右喫重情形較之皖南爲尤甚而本省兵力全爲臨瑞吉三城所困未得分防廣饒臣前有奏調粵兵之請至今未據該省咨覆總兵壽山管帶潮州兵亦於六月閒撤退回粵此外鄰近省分浙兵則自顧不暇閩兵雖屢經催調亦難指望因思



江南大軍集有數萬率多精銳從前圍攻句溧  
兩城正在喫緊未敢遽行請調現在兩城已復  
儘能分撥若干協助江西亦無兵單之患惟臣  
旣經請撥必須素所熟習者方能駕馭合宜查  
有參將戴文英馮子材守備張永清梁成桂等  
管帶之廣勇一千五百名隨臣營年久兵將最  
習又遊擊興貴等管帶兩起陝甘兵一千餘名

與西安滿兵可期聯絡一氣又西安二起馬隊  
四百餘名可與臣所帶之西安頭起合成一隊  
共計兵勇三千名在江南稍有所減在江西大  
有所增應請

旨飭令和春照數撥調並將各原帶將官一併派委管  
帶兼程馳赴臣營以資調遣奏入

上命軍機大臣傳諭和春福興曰據福興奏江西軍情

喫重本省兵力不敷請由江南大營調撥廣勇一千  
五百名又遊擊興貴等帶兩起陝甘兵一千餘名西  
安二起馬隊四百名共計兵勇三千名前往江西助  
勦並請將原帶廣勇之戴文英馮子材張永清梁成  
桂原帶陝甘兵之興貴等一併派委管帶馳往各等  
語現在江南官兵環攻鎮江軍情正當喫緊其勢恐  
難多調現已諭令葉名琛由廣東撥兵二千名派總

兵壽山統帶馳往福興軍營助剿惟江西省東路兵力尙單福興原帶之兵祇有千名著和春卽將福興指調之將弁兵勇能否派撥若干之處酌量情形迅速調撥

上又命軍機大臣傳諭葉名琛曰本年正月間曾諭令葉名琛酌調精兵一二千名交參將衛佐邦管帶間道馳赴福興軍營助剿迄今未據覆奏本日據福興

奏以所帶兵勇數止一千請由江南大營添調並稱  
潮州鎮總兵壽山所帶潮州官兵因南贛無事已於  
六月間回粵該將軍所請粵兵杳無音信等語此時  
江南官兵正當圍攻鎮江喫緊一時未必卽能分撥  
南贛一路業已平靜則壽山一軍卽可馳赴廣信聽  
候福興調遣著葉名琛速飭該總兵卽行管帶精兵  
二千名剋日前往以資攻勦毋稍遲延

福興又奏言遊擊賴高翔等進攻樂平踞賊該  
匪突出五六千人分路來撲賴高翔與都司馮  
日坤等各率弁勇迎敵鏖戰兩時之久該逆拌  
死抗拒馮日坤驟馬衝入賊隊用洋槍擊中黃  
衣賊目羣賊用矛橫刺該都司脇中矛傷仍裹  
創力戰手刃數賊賊匪遂潰賴高翔等揮軍繼  
進陣斬三百餘名生擒數十名溺斃河內者不

計其數該逆被剿窮蹙欲圖竄逸六月十二日  
全隊突出北門當被團勇轟斃二百餘名衆兵  
追剿又斃匪三百餘名餘匪俱奔往景德鎮老  
巢當將樂平縣城收復同日署饒州府知府馮  
詢亦將該郡城北四十里街賊巢剿毀正擬進  
攻景德據報東鄉賊匪突竄安仁由萬年西路  
繞越斜竄李元度帶勇追剿殲斃二百餘名其

南路金谿之賊又由孔坊陽田一路出撲上清  
鎮當經平江營分軍馳往扼剿登時擊退臣現  
飭李元度添派得力勁旅會合賴高翔同路進  
剿以期速就殲除

福興又奏言廣信防守緊要臣離郡後若無明  
幹大員駐守不足以資鎮壓查新授廣饒九南  
道沈葆楨諳練軍務上年署理廣信府篆克保



危城輿情愛戴地方一切情形尤所熟悉前經  
派令抽辦河口玉山兩處釐捐均距郡城甚近  
卽飭令該道駐紮廣信辦理防勦事宜所有在  
防文武統歸節制以專責成仍就近兼辦捐事  
亦不致有貽誤

福興又奏言臣前以饒防爲重必先固守門戶  
然後可圖攻撫建因令總兵李定太趕緊出省

赴勦饒屬嚴絕賊援嗣據撫臣先後咨稱福建  
及贛甯敗賊屬集撫建並分股竄至新淦有分  
犯進賢豐城之說均偏近省垣重地須令李定  
太統率進賢防兵以勦爲堵臣卽催令李定太  
剋日出省由進賢一路進勦副將周鳳山一軍  
聞已由吉安至省亦可由豐城一路進偏撫州  
並有統帶湖南援師道員王鑫於克復樂安後

進勦宜黃等縣直趨撫建二郡業飭乘勢迎勦  
而前至臣原議移紮弋陽以便就近調度近接  
玉山縣探稟浮梁股匪有突竄德興之警又聞  
婺源被擾總兵饒廷選已由常山親往堵勦廣  
信後路更涉空虛若此郡稍有疏虞則於東路  
大局殊有妨礙臣勢不得不仍紮信城以示鎮  
壓奏入均報

同日福濟鄭魁士奏言皖軍自分紮廬州柘皋  
梁園聲勢聯絡賊不敢窺祇以餉需不給未能  
前進擬俟藩司李孟羣帶勇到廬會同大舉無  
如該司由霍抵六勇費不支尙在流波礮麻埠  
地方停兵以待而六安逆匪因之守禦益堅復  
由正陽關霍邱調集外援意圖先發其舒城三

河巢縣等賊黨與日衆窺伺廬城本月初一日  
舒城出賊千餘在張仙菴肆擾經我兵奮力擊  
退隨在該處築營二座初六日賊出撲營知縣  
甘文瀾等設伏以待該逆直偪營前伏兵並起  
刺斃黃衣賊首二名槍斃數十名初九日巢縣  
出賊二三千名由萬山口直趨夏閣總兵吉順  
督飭馬隊迎剿該逆膽敢拒戰我軍馬隊直前

衝殺步隊從兩旁抄擊賊始大敗各兵分投追擊逆屍載道淹斃尤多聞三河及沿湖之賊欲紮營施口堵我水師臣福濟前派知縣黃際昌督造戰船兼整團練並派都司阿克敦帶恆勇二百名前往接濟幸已布置嚴密設卡十五座列營四座聲威尙壯臣鄭魁士躬率將士剋期西行爲李孟羣應援並通餉道令吉順相機規

取巢縣其舒城三河及沿湖一帶均擬分兵駐紮防賊乘虛來攻臣福濟亦卽回守廬州居中調度此目前一定之局萬難刻延而餉乏絲毫焉能濟事惟有籲懇

天恩飭下何桂清按月添撥二萬共四萬兩並令晏端書按月籌撥二萬山陝兩省月解二萬庶不至因飢致潰覆轍相循臣等亦得激勵衆心踴躍

從事奏八

上命軍機大臣傳諭何桂清晏端書恆福曾望顏曰據  
福濟等奏現在六安賊援愈集李孟羣一軍阻於流  
波碰麻埠地方亟應厚集兵力會同攻勦而餉項短  
絀飢軍難振等語著何桂清於按月二萬兩外再添  
撥銀二萬兩按月如數解往山西陝西兩省月解皖  
餉著恆福曾望顏按照每月二萬兩之數務各如期



起解勿稍遲滯至浙江省於接濟各路餉需之外恐  
未能再行按月籌銀解廬惟該處待餉甚迫仍著晏  
端書竭力籌撥以資接濟

二十七日

丙午

德興阿翁同書奏言瓜鎮之賊自

和春張國樑移師京口連營扼險頗形聳懼臣  
等仍傳令水陸諸軍合力進勦務與南岸鉦鼓  
之聲相應以期必克十三日德興阿親督總兵

鞠殿華等護運大礮進攻列隊於運河兩岸而別派馬步隊設伏於西路之馬橋忽見兩岸賊巢出賊數百名意欲搶我礮筏我兵開礮疊擊斃賊多名又見馬橋迤南叢葦中出賊百餘名欲抄我軍後路伏兵齊起掩擊斃賊十餘名賊始敗回又據陳國泰稟稱派防南岸高資之守備賴鎮海於十三日偵知張國樑統帶重兵進

勦高資鮎魚套之賊該守備卽揮令各船揚帆  
起碇駛至鮎魚套口門近岸攻擊該逆沿江開  
礮抗拒我軍用大礮轟倒江邊新築礮臺數座  
擊沈划船數隻溺斃賊匪數名乘勢進攻鮎魚  
套口內賊巢擊毀巢內房屋無數臣等前撥礮  
筏載六千斤大礮二尊交陳國泰由江邊夾擊  
已於十五日運筏試攻擊塌賊壘數處隨將礮

後偏近賊壘西南角轟擊該逆俱鼠伏不出探  
聞南岸官兵進剿高資杜賊外援連營相望聲  
勢極壯現飭賴鎮海務遵張國樑調遣協剿高  
資以冀併力圖攻毋分畛域奏入報